

Deu si viu zfrüh, angeri chöme chli knapp, es paar si no chli schüch u die angere chöme voller Elan. Aber eis hei aui Kind gmeinsam, si chöme gärn zu üs is Kitu. Das Johr hei mir müesse ä Obergränze setze, nid meh aus 28 Kind. Es git bereits ä Warteliste mit 7 Kind, we öper ufhört, de rütscht eis noche.

Nachem Begrüssigskreis, düe mir üs mitemne Fangis oder chline Spieli ufwärme. Dört chöi si zerscht mou lutstark ihri Energie useloh.

Am liebste hei si, we mir när ganz viu Grät fürenäh u dermit ä Parcours ufsteue. De chöi si ar Sprosewand klättere, vom Schwedekaste gumpe, übere Stufebarre balaciere u mit Bäll probiere dr Korb zträffe. Es brucht Gschick, Geduld u viumous ou chli Muet neus uszprobieren. Aber si mache das aui super u würde am liebste gar nüme ufhöre.

D Stung vergeit wie im Flug u scho müesse mir wägrume, das brucht ou no chli Zyt. Aber üsi chline Knöpf häufe gärn tatkräftig mit. Mit gmeinsame Kräfft lüpfen si Bänkli ufenang, stosse dr schwär Schwedekaste a si Platz u sogar die grosse Matte chöi mir mit ihrer Hilf wieder ufe Wage due.

We aues fertig verrumt isch, u no chli Zyt blibt, spiele mir no öpis chlises oder müesse üs scho wieder vo de Kind verabschiede. Schnäu springe si zu de Eltere zum verzeue was si aues gmacht hei, wär Naseblüete oder ä Büüle het gha u vergässe drum immer wieder mou es Trinkfläschli oder Socke.

No hurti ä Blick vo üs id Garderobe, öb aui abholt wärde u de mache sich aui happy u chli müed ufe Heiwäg, inkl am Gabi u mir 😊

Fürs Kitu d Leiterinne Gabi u Tanja